

HOMBER DRUMI DILANTI UN STORE TABATA MORTO

ORANJESTAD (AAN): Un caso seguramente di lamenta tabata esun, unda un mama a yama Polis pa su yiu homber, kende pa colmo tabata morto sin cu e mama tabata sa esaki e momento ey.

Ta asina cu asistencia a worde solicita pa un homber cu ta drumi na altura di Ayo Liquor Store. Miembro di e Patruya cu a yega na e sitio ta topa cu e señora di inicial C.B. di 73 aña di edad.

E señora a splica autoridatnan, cu el a haya su yiu homber di inicial F.S.E. di 52 aña drumi riba vloer dilanti di e establecimiento menciona. Polis a constata esaki tambe y alaves a nota

cu e homber aki no ta duna señal di bida, pa cual e agentenan a solicita un medico na e sitio indica.

Doctor Lacle, kende mientras tanto a presenta a constata morto di e victima yama Francisco Savero

Erasmus cu a nace dia 3 di December na aña 1943. E ta biba na Matividiri 24 segun version Policial.

DIARIO ta extende palabranan di profundo condolencia na famianan di Francisco Savero Erasmus.

CASO MISTERIOSO DESTRUCCION GLAS DI AUTO

ORANJESTAD (AAN): Un patruya di Polis a worde dirigi pa atende un asistencia den Weg Rooi Congo. Presencia di Polis tabata relaciona cu destruccion di un vehiculo.

Tabata casi tres'or di marduga, cu e señora Colombiano di inicial G.C. di 26 aña di edad a pidi presencia di Polis. E señora a splica Polis, cu e ta di bishita cerca un amigo.

Direpiente el a sinti sonido di glas cu sea a cay of ta worde destrui. Esaki a pone bay pafor pa averigua kico lo por a pasa. El a nota cu dos glas di su auto ta destrui, ademas e señora, a nota cu tin ningun persona den vecindario di su auto. E señora G.C. si tin fuerte sospecho cu su esposo mes lo a destrui glas di su auto. Debi cu recientemente señora lo a "gare" cu un otro muher.

Polis a recomenda e señora cu e por pasa na despacho di Recherche pa entrega keho. Mientras e señora a pidi Polis pa hibe cas ya cu e tin un poco miedo di bay cas.



Proclamacion



NOS:

PRINS: DUM

Alto magistrado di Shiribana
Comandante mayor di Paradera
Fiscal General di Nuña y San
Barbola
Teniente capitan di Rooi Afo
y Jaburibari
Vice emperador di Modanza

PANCHO: PLIN

Papi Doys di Ayo y Cashero
Macho Lindo di Sero Pita
Galan elegante di Tamarijn
y Cori Bori
Alto joncuman di Rooi
Prikitchi y Matividiri

Sirbidonan humilde di Comunidad carnavalesco di Aruba

CONSIDERANDO:

Cu pa carnaval di Aruba sigui den bon caminda cu su luho, belleza, distincion y sobresaliente riba tur carnaval na mundo, ta aplica medidanan di urgencia pa carnaval 42.

1....Entrante awe Prins Dum y Pancho Plin eligi pa medio di eleccion di mas democratico posible, ta ocupa Entertainment Center como nan Palacio Gubernamental.

2....Como cu ta ser bisa cu economia di e isla di carnaval ta un di e mihoran di e region aki, ta baha prijs di comestible te na un florin y cobra sales tax di 50 cent pa reconstrui edificionan cu a kima durante ultimo lunanan.

3.... Pa evita cu mucho ilegal ta drenta nos isla, y pa percura pa empleo pa nos hendenan legal, di recursion abao, ta decreta cu pa seguridad di nos tur, entrante awe tur choller lo ocupa puestonan di control den waf y na aeropuerto, y riba guardacosta.

4....Debi na e hecho cu tin un escases grandi di vivienda riba nos isla apesar di Plan Nacional pa Traha Cas, lo importa blokinan di ijs di Alaska na prijs abao, pa clase medio por tin su propio cas den futuro.

5....Pa evita problemanan di SETAR y Fabiola, lo institui un compania netamente Arubano di telecomunicacion cu su propio satellite Arusat, y percura pa cada habitante tin gratis, pornada y sin paga, un telefon celular den baño, cushina y den hokki di bestro.

6.... Pa pone un fin na publicacionnan riba labamento di placa, ta prohibi pa importa mashine di laba paña, y ta bay back pa "washi" y baña cu aw'i blauws.

7....Como cu hopi stranhero riba nos isla no por papia nos idioma, lo exige cu pa haya empleo, nan mester por comunica cu nos hendenan, y cada empresa ta pone un borch na entrada indicando: Aki se papia "Hablamento".

8.... Pa tranquilidad y orden durante eventonan musical manera calypso y roadmarch infantil y juvenil, na lugar di bende carchi cada persona lo mester presencia e evento cu "scotch tape" na boca y mannan den gips, pega cu "Crazy Glue".

9....Pa progreso y diversifica economia di nos isla, lo converti

nos Hospital den un fabrica di bacteria pa exportacion bao marca di "Strap to Coco Arubano".

10....Pa turistanan tambe contribui na Medio Ambiente di Aruba, ta prohibi cada turista di drenta lama pa baña y hunta na zeta, sin cu nan tin un stofzuiger den man pa haci lama limpi despues.

11....Como cu prijs di hospital ta ser aumenta cu 10 por ciento, lo cambia 1ste klas pa Business y Economy Klas, y nan patientnan lo cubri tur gasto di patientnan di 2e y 3e klas cu asina ta haya un alivio financiero.

Tur doctor y specialista riba nos isla lo traha 8 luna "pa amor al arte" sin cobra.

y por ultimo

12....Pa salvaguardia nos Medio Ambiente, tur doño di cabrito, burico y porco, den e temporada aki mester percura pa nan animalnan tin pampers bisti ora sali di cura, y pa nan salud, duna nan papel di corant pa come.

Como cu tradicionalmente nos mandatarionan ta ser bon trata na traspaso di mando, a dicidi pa cada un lo siguiente:

A: Nos gobernador lo haya beca pa Zaire, pa studia consecuencianan di virus di Ebola.

B: Nos prome ministro lo bay haci un viaje di trabao pa Siera Leona pa studia e arte di "contragolpi di estado".

C: Nos parlamentarionan ta keda encarga pa drenta cuevanan di nos isla y sin flashlight, y explora te unda nan ta alcanza y traha mapa di cada coreador pa proyecto nobo di hospital na San Nicolas.

D: Otro miembronan di Consejo di Ministronan ta keda riba nos isla. Pa spaar placa di asfalt; cu glasan garna di bakinan di glas; nan mester tapa tur buraco cu tin den careteranan di nos isla.

CONCLUSION:

Pa Carnaval di Aruba sigui mantene su number di Carnaval di mas sigur na mundo y manteniendo e slogan di Anti-droga, Anti alcohol, Anti desorden, y Pro moral y Pro Decensia, ta pidi tur habitante pa cuida nos turismo, nos idioma y dignidad, matene nos sentido civico durante carnaval 42.

Pancho Plin ta keda encarga pa ehecuta e decreto aki y percura pa copia wordo manda pa Landsrecherche,, Kustwacht, Spartacus Ginis, Kabrietenclub, Fabula Fabiola, CNN, y via tur satelite den orbita; manera el a ser formula y presenta.

Duna y firma
na Palacio Entertainment Center
y sella na Monumento Historico Wilhelminastraat
e di 4 dia di e di dos luna
di aña di carnaval 42, 1996.

PRINS DUM
(Anthony Dijkhoff)

(Signature of Anthony Dijkhoff)

PANCHO PLIN
(Carlos Pastor)

(Signature of Carlos Pastor)